

## ■ COLUMNA

# I basta!

DAD ERWIN ARDÜSER\*

**G**ea, i basta propi! Dapertut regia caos e confusiuin. Mintgin fa quai ch'el vul, e naging na prenda resguard sin il vischin. Ordavant cun il bun exempel van ils Americans che na dovran insumma nagins vischins ed ils Englais che na vulan savair nagut pli da lur vischins. Nus Svizzers n'avain nagins problems cun noss vischins, nus essan neutrals, vivain en pasch e concordia cun in e scadin, ed avain era francà quai en il preambel da nosa constituziun:

**E**n num da Dieu il Tut-pussant! Il pievel svizzer ed ils chantuns, en lur responsabladad envers la creaziun, cun l'intenziun da renovar la lia, per mantegnair la libertad e la democrazia, l'indipendenza e la pasch en solidaritad ed avertadad vers il mund, cun la voluntad da viver lur varietad en l'unitad en toleranza e respect vicendaivel, conscients da las prestaziuns communablas e da la responsabladad envers las generaziuns futuras, savend che liber è be quel che dovra sia libertad e che la fermezza dal pievel sa mesira vi dal bainstar dals flaivels (...)



**Q**uai tuna stoda bain! Dovri lura anc dapli per reglar la convivenza cun ils vischins vi sur mar, dador noss cunfins, da l'otra vart da la via?

**N**a, i na dovra betg dapli, sch'ins prenda il pled per il pled, respecta e viva quai che stat en il preambel da nosa constituziun.

**E**lura quai! En La Quotidiana dals 30 da schaner legel jau il suandant:

**I**ndependentamain da la vegliadetgna, da la schlattaina, da la colur da la pel, da la religun u da l'orientaziun sexuala. La gronda varietad en la pitschna Svizra dumonda chapientscha e solidaritad da nus tuts. Era nus vulain contribuir nosa part latiers cun reunir umans. Perquai

ans engaschain nus per ina societad multifara e senza discriminaziun.

**I**n appel per dapli umanitad, dapli chapientscha vicendaivla, dapli respect? Il text d'in filosof, d'in impurtant manader da l'economia, d'in president da stadi? Bler meglier, i sa tracta d'ina reclama per ina bavronda che John Pemberton ha inventà l'onn 1886, e che ha suenter la Segunda Guerra mundiala conquistà il mund. Pemberton vendeva la bavronda t.a. sco medischina cunter stancladad, mal il chau, depressiun ed impotenza. Ozendi dustain nus la said cun la bavronda naira sco il charvun, e cunter mal il chau prendain nus ina pirla.

**A**nc n'hai jau betg dà si la speranza che la carstgaunadad prenda a cor ils plets che stattan al cumenzament da nosa Constituziun federala. E sche quella na persvada betg, lura che forsa quella reclama da Coca Cola maina nus sin la dretga via ed a la pasch tranter pievels, carstgauns e vischins.

**V**iva!

\* Erwin Ardüser abitescha a Laax e lavura en l'administraziun dad RTR.